

ქონების დაზღვევის პირობები
№ICG/PROPVTB/2017/V1

1. ტერმინთა განმარტება:

- 1.1. „**მზღვეველი**“ _ სს „სადაზღვევო კომპანია აი სი ჯგუფი“, რომელიც საქართველოს კანონმდებლობის შესაბამისად ეწევა სადაზღვევო საქმიანობას (დაზღვევის (არა სიცოცხლის) ლიცენზია №001/2);
- 1.2. „**დამზღვევი / დაზღვეული**“ _ იურიდიული ან ფიზიკური პირი, რომელიც სადაზღვევო პოლისითა და განაცხადით განსაზღვრულ ქონებას აზღვევს მზღვეველთან.
- 1.3. „**მოსარგებლე**“ _ იურიდიული ან ფიზიკური პირი, რომელიც წინამდებარე ხელშეკრულება/პირობების თანახმად იღებს სადაზღვევო ანაზღაურებას;
- 1.4. „**დაზღვევის ობიექტი**“ _ სადაზღვევო პოლისში ან/და მის დანართში მითითებულ, დამზღვევის კანონიერ საკუთრებაში (მფლობელობა, სარგებლობა) არსებულ ქონებას ან/და მის ცალკეულ ნაწილთან დაკავშირებული ქონებრივი ინტერესები, რომელიც დაკავშირებულია ამ ქონების ფლობასთან, გამოყენებასა და განკარგვასთან;
- 1.5. „**სადაზღვევო პოლისი**“ _ მზღვეველის მიერ გაცემული მოწმობა წინამდებარე დაზღვევის პირობების შესახებ;
- 1.6. „**სადაზღვევო თანხა**“ _ თანხის მაქსიმალური ოდენობა, რომლის ფარგლებშიც დადგენილია მოსარგებლისათვის სადაზღვევო პერიოდის განმავლობაში დამდგარი სადაზღვევო შემთხვევის შედეგად მიყენებული ზიანის ანაზღაურება.;
- 1.7. „**სადაზღვევო შემთხვევა**“ _ წინამდებარე პირობებით და/ან მის საფუძველზე გაცემული სადაზღვევო პოლისით გათვალისწინებული სადაზღვევო რისკის დადგომით გამოწვეული ზიანი, რომელიც წარმოშობს მზღვეველის ვალდებულებას, გასცეს სადაზღვევო ანაზღაურება.
- 1.8. „**სადაზღვევო რისკი**“ _ მოვლენა, რომელიც შეიცავს მისი დადგომის შესაძლებლობის და შემთხვევითობის ნიშნებს და რომლის გამოც ხდება დაზღვევა;
- 1.9. „**რეალური საბაზრო ღირებულება**“ _ ფულადი თანხა, რომელზეც მოცემულ გეოგრაფიულ არეალში არსებულ ბაზარზე გაიცვლება შესაფასებელი ქონება შეფასების თარიღისათვის ნებაყოფლობით მყიდველსა და გამყიდველს შორის დადებული სამართლიანი გარიგების შედეგად, როდესაც თითოეული მხარე მოქმედებს კომპეტენტურად, გააზრებულად და ყოველგვარი ძალდატანების გარეშე;
- 1.10. „**აღდგენითი ღირებულება**“ - ფულადი თანხა, რომელიც საჭიროა დაზიანებული ქონების სრულად აღსადგენად, აღდგენითი სამუშაოებისა და მასალების / სათანადო ნაწილების ღირებულების ჩათვლით.
- 1.11. „**შენაცვლებითი ღირებულება**“ – რეალური საბაზრო ღირებულება ქონების ასაკისა და მდგომარეობის გათვალისწინებით.
- 1.12. „**სადაზღვევო პრემია**“ _ სადაზღვევო პოლისში მითითებული დამზღვევის მიერ მზღვეველთან შეთანხმებული გრაფიკით გადასახდელი დაზღვევის საფასური;
- 1.13. „**არსებითი გარემოება**“ _ დაზღვეულ ქონებასთან დაკავშირებული ნებისმიერი ინფორმაცია, რომელიც დაზღვევამდე იყო / უნდა ყოფილიყო ცნობილი დამზღვევისათვის ან/და დაზღვევის შემდეგ გახდა მისთვის ცნობილი, რომელსაც შეუძლია გაზარდოს ზარალის დადგომის ალბათობა;
- 1.14. „**რეგრესის წესი**“ _ მზღვეველის უფლება დაიკმაყოფილოს თავისი მოთხოვნები სადაზღვევო შემთხვევის დადგომაში ბრალეული მხარისაგან;
- 1.15. „**სადაზღვევო პერიოდი**“ _ დაზღვევის მოქმედების ვადა;
- 1.16. „**ფრანშიზა**“ _ ზიანის ოდენობა, რომელსაც არ აანაზღაურებს მზღვეველი. ფრანშიზა გამოიქვითება ყოველი ანაზღაურების გაცემისას და ვრცელდება ყოველ რისკზე სადაზღვევო პოლისში მითითებული ერთი და იმავე ან განსხვავებული ოდენობით. თუკი სადაზღვევო პოლისით სხვა რამ არ არის გათვალისწინებული, იგულისხმება, რომ ფრანშიზა არის უპირობო;
- 1.17. „**ქურდობა**“ _ ქონების ფარული დაუფლება, მართლსაწინააღმდეგო მისაკუთრების მიზნით (სსკ 177-ე მუხლი);
- 1.18. „**პარცვა**“ _ ქონების მართლსაწინააღმდეგო აშკარა დაუფლება მართლსაწინააღმდეგო მისაკუთრების მიზნით (სსკ 178-ე მუხლი);
- 1.19. „**ყაჩაღობა**“ _ თავდასხმა, ქონების მართლსაწინააღმდეგო მისაკუთრების მიზნით, ჩადენილი სიცოცხლისთვის ან ჯანმრთელობისთვის საშიში ძალადობით ან ასეთი ძალადობის გამოყენების მუქარით;
- 1.20. „**მიმდინარე სადაზღვევო ლიმიტი**“ _ სადაზღვევო თანხა სადაზღვევო პერიოდის განმავლობაში უკვე ანაზღაურებული ზარალების გამოკლებით;
- 1.21. „**დაზღვევის განაცხადი-ანეკტა**“ – მზღვეველის მიერ შემუშავებული, დამზღვევის მიერ შესავსები კითხვარი, რომელშიც აისახება დაზღვევის განხორციელებისათვის აუცილებელი მონაცემები;

1.22. „დაზღვევის შესახებ ხელშეკრულება“ – შემდეგი დოკუმენტების ერთობლიობა: წინამდებარე ხელშეკრულება/პირობები, დამზღვევის მიერ შევსებული განაცხადი-ანკეტა, დამზღვევის მიერ წარმოდგენილი დოკუმენტაცია, სადაზღვევო პოლისი, ასევე წინამდებარე ხელშეკრულებით განსაზღვრული ან მხარეთა შორის დამატებით შეთანხმებული ნებისმიერი დოკუმენტი

2. ხელშეკრულების საგანი

- 2.1. წინამდებარე ხელშეკრულების საგანია მზღვეველის მიერ დამზღვევის/დაზღვეულის კანონიერ საკუთრებაში/სარეგებლობაში არსებული ქონების დაზღვევა და შესაბამისი სადაზღვევო მომსახურებით უზრუნველყოფა საქართველოს კანონმდებლობისა და წინამდებარე ხელშეკრულებით გათვალისწინებული პირობების შესაბამისად;
- 2.2. დაზღვევა ხორციელდება სადაზღვევო პოლისით განსაზღვრული რისკებისაგან;
- 2.2.1. წინამდებარე დაზღვევის ხელშეკრულება/პირობები ძალაშია მხოლოდ მაშინ, როდესაც კანონის, სხვა სამართლებრივი აქტის ან ხელშეკრულების საფუძველზე დამზღვევს გააჩნია სადაზღვევო ინტერესი დაზღვეული ქონების მიმართ.
- 2.3. სადაზღვევო ხელშეკრულების გაფორმების ძირითადი საფუძვლები:
 - 2.3.1. ქონების დაზღვევის წერილობითი განაცხადი-ანკეტა (შევსებული და დამოწმებული დამზღვევის მიერ მზღვეველის მიერ შემუშავებული ფორმის შესაბამისად);
 - 2.3.2. მზღვეველის მიერ შედგენილი დასაზღვევო ქონების დათვალიერების ოქმი (მზღვეველის მიერ აღნიშნული ქმედების განხორციელების შემთხვევაში);
 - 2.3.3. ინფორმაცია იმ გარემოებების შესახებ, რომლებმაც შეიძლება გავლენა იქონიონ სადაზღვევო რისკის შეფასებასა და დაზღვევის სხვა პირობებზე. მზღვეველის გადაწყვეტილებით აღნიშნული ჩამონათვალი შეიძლება გაიზარდოს, შემცირდეს ან/და დაზუსტდეს.

3. დაზღვევის ობიექტი

- 3.1. დაზღვევის ობიექტს წარმოადგენს დამზღვევის ქონებრივი ინტერესები, რომლებიც დაკავშირებულია ქონების ფლობასთან, გამოყენებასა და განკარგვასთან საქართველოს კანონმდებლობით დადგენილი ნორმების შესაბამისად;
- 3.2. წინამდებარე ხელშეკრულება/პირობების საფუძველზე დასაზღვევად მიიღება დამზღვევის / დაზღვეულის ქონება: შენობა-ნაგებობები, შიდა მოპირკეთება, ტექნოლოგიური და საწარმოო მოწყობილობა, ინვენტარი, გამოთვლითი ტექნიკა, ელექტრონული ხელსაწყოები, ორგტექნიკა, აუდიო-ვიდეო აპარატურა, სხვა სასაქონლო-მატერიალური ფასეულობები – წინამდებარე ხელშეკრულება/პირობების შესაბამისად;
- 3.3. დასაზღვევად არ მიიღება: დოკუმენტები, საბუღალტრო და სხვა სახის საქმის წარმოების წიგნები, ხელნაწერები, ნახაზები, ნიმუშები, მოდელები, მაკეტები, ანტიკვარიატი, ხელოვნების ნაწარმოებები, სავაჭრო ავტომატები, ბანკომატები, ფულის გადამცვლელი ავტომატები და მათი შიგთავსი, ძვირფასი ლითონები და მათი ნაწარმი, ძვირფასი ქვები, ბეწვეული და მისი ნაწარმი, ფასიანი ქაღალდები, ობლიგაციები, ნაღდი ფული, კომპიუტერსა და სხვა სახის ანალოგიურ სისტემებში არსებული ტექნიკური საინფორმაციო საშუალებები (მაგნიტური ბლოკი, მაგნიტური ლენტა, საინფორმაციო ბლოკი და სხვ.) და ინფორმაციის სხვა მატარებლები, ფეთქებადი და აალებადი საგნები, ცეცხლსასროლი იარაღი, შახტები, ავტოსატრანსპორტო საშუალებები, ნარგავები და ცხოველები, თუ სადაზღვევო პოლისით სხვა რამ არ არის გათვალისწინებული;
- 3.4. დასაზღვევად მისაღები ქონების ნუსხა განისაზღვრება მხარეთა შეთანხმებით და მითითებული იქნება განაცხადში და/ან პოლისის საგანგებო დანართში.

4. რისკების ჩამონათვალი, სადაზღვევო თანხა და დაზღვევის განხორციელების წესი

4.1. სადაზღვევო პოლისით შესაძლოა განისაზღვროს შემდეგი სადაზღვევო რისკები:

- ხანძარი, მეხის დაცემა, აფეთქება, თვითმფრინავის ჩამოვარდნა (FLEXA);
- სტიქიური უბედურებები, მათ შორის წყალდიდობა, შტორმი, ქარიშხალი (ქარის სიჩქარე აღემატება 20მ/წმ), ქარბუქი, მეწყერი, ქვისცვენა, ნიადაგის ჩამოშლა, მიწისძვრა
- წყლით დაზიანება (წყალსადენის, გასათბობი, ხანძარსაწინააღმდეგო, საკანალიზაციო სისტემების უეცარი და მოულოდნელი მწყობრიდან გამოსვლის შედეგად; წყლის შემოჭრისას მეზობელი სადგომებიდან, მიწისქვეშა წყლების გამოსვლისას წყალდიდობის, თავსხმის, მდინარეების ადიდების შედეგად);
- ქურდობა, ძარცვა, ყაჩაღობა, მესამე პირების მიერ ქონების განზრახ დაზიანება / ვანდალიზმი. ამავდროულად, ქურდობა ან ქურდობის მცდელობა იფარება მხოლოდ ძალისმიერი შეღწევის შემთხვევებში: ქურდობა ძალისმიერი შეღწევით ნიშნავს, რომ 1. მართლსაწინააღმდეგო ქმედების ჩამდენი პირი შევიდა დაზღვეულ შენობაში კარის ან ფანჯრის ჩატეხვით, ყალბი გასაღების

ან გამღების ან სხვა ტექნიკური საშუალების გამოყენებით. ყალბ გასაღებად ითვლება ისეთი გასაღები, რომელიც დამზადებულია იმ პირების მითითებით, რომელთაც არ ჰქონდათ ორიგინალი გასაღების განკარგვის უფლება. ამავე დროს, ქონების გაქრობა დაზღვეული ტერიტორიიდან არ არის საკმარისი იმის სამტკიცებლად, რომ ადგილი ჰქონდა ყალბი გასაღების გამოყენებას. 2. მართლსაწინააღმდეგო ქმედების ჩამდენმა პირმა დაზღვეულ შენობაში გატეხა ნივთები, რომლებშიც ინახებოდა დაზღვეული ქონება, ან გახსნა ეს ნივთები ყალბი გასაღების ან გამღების ან სხვა ტექნიკური საშუალების გამოყენებით. დაზღვევა არ ვრცელდება იმ ტერიტორიებზე, რომელიც საწარმოო და/ან ეკონომიკური დანიშნულებით გამოიყენებოდა ერთობლივად მესამე პირებთან ერთად. 3. მართლსაწინააღმდეგო ქმედების ჩამდენმა პირმა ნივთები ამოიღო დახურული შენობიდან, რომელშიც მან ადრე შეაღწია ჩვეულებრივი გზით, მალულად დარჩა იქ შენობის დახურვამდე და გამოაღწია შენობიდან 3 1-ში მითითებული საშუალებების გამოყენებით. შესაძლებელია, ასევე, მართლსაწინააღმდეგო ქმედების ჩამდენმა პირმა ამოიღოს ნივთები დახურული შენობიდან, სპეციალური ხელსაწყოების გამოყენებით, შენობაში შეღწევის გარეშე. 4. ქურდობის დროს მოხდება მართლსაწინააღმდეგო ქმედების ჩამდენი პირის გამოვლენა და ის იყენებს 31 და 2-ში მითითებულ საშუალებებს, მოპარული ქონების დაუფლების მიზნით. 5. დაზღვევა არ ფარავს პოლისში მითითებულ მისამართზე განლაგებული შენობის გარეთ მდებარე ქონების ქურდობის შემთხვევებს.

- ავტოსატრანსპორტო საშუალების შეჯახება;
- ვიტრინების დაზიანება;

5. ტერიტორიული ფარგლები

წინამდებარე ხელშეკრულება/პირობების საფუძველზე განხორციელებული დაზღვევის მოქმედების ტერიტორიული ფარგლები, რომელიც მითითებულია შესაბამის სადაზღვევო პოლისში.

6. მხარეთა უფლება-მოვალეობანი

6.1. დამზღვევი/დაზღვეული ვალდებულია:

- 6.1.1. გადაიხადოს სადაზღვევო პრემია შეთანხმებული გრაფიკის მიხედვით;
- 6.1.2. უზრუნველყოს მზღვეველის უფლებამოსილი წარმომადგენლის მიერ ქონების დათვალიერება (რაც ჩაიწერება სადაზღვევო განაცხადში). დათვალიერების დასრულებამდე მზღვეველი არ გასცემს სადაზღვევო პოლისს და თავისუფალია თავისი ვალდებულებებისგან;
- 6.1.3. პოლისის გაცემამდე გააცნოს მზღვეველს ყველა მისთვის ცნობილი გარემოება, რომელთაც მნიშვნელობა აქვს სადაზღვევო რისკის შეფასებისას, აგრეთვე, ამ ქონებასთან დაკავშირებული ყველა დადებული ან დასადები სადაზღვევო ხელშეკრულება;
- 6.1.4. უზრუნველყოს მზღვეველი რისკის შეფასებისათვის მნიშვნელობის მქონე ნებისმიერი მონაცემებით/ინფორმაციით, მათ შორის მიაწოდოს მზღვეველს ინფორმაცია აღნიშნულ მონაცემებში/ინფორმაციაში ცვლილებების შესახებ, ცვლილებების განხორციელებიდან არაუგვიანეს სამი სამუშაო დღისა. იმ შემთხვევაში, თუ აღნიშნული ცვლილება ზრდის რისკის ზომას ან ხარისხს, მზღვეველს აქვს უფლება მოსთხოვოს დამზღვევეს დამატებითი სადაზღვევო პრემიის გადახდა ან ცალმხრივად შეწყვიტოს წინამდებარე ხელშეკრულება რისკის გაზრდისთანავე. მზღვეველი უფლებამოსილია არ აანაზღაუროს ზიანი, რომელიც გამოწვეულია მზღვეველისთვის შეუტყობინებელი გარემოებების შედეგად.
- 6.1.5. წინამდებარე პირობებით გათვალისწინებული დაზღვევის მოქმედების პერიოდში დაუყოვნებლივ შეატყობინოს მზღვეველს სადაზღვევო ინტერესის შეცვლის შესახებ;
- 6.1.6. მიიღოს ყველა აუცილებელი ზომა დაზღვეული ქონების კარგ მდგომარეობაში შესანახად, შესაძლო ზარალის თავიდან ასაცილებლად ან შესამცირებლად;
- 6.1.7. დაუყოვნებლივ და არაუგვიანეს 72 საათის განმავლობაში შეატყობინოს მზღვეველს სადაზღვევო შემთხვევის დადგომის ან ნებისმიერი გარემოების შესახებ რამაც შეიძლება გამოიწვიოს სადაზღვევო შემთხვევის დადგომა;
- 6.1.8. სადაზღვევო შემთხვევის დადგომისას, აგრეთვე, ზიანის გამომწვევი პირის შესახებ ინფორმაციის ფლობისას, დაუყოვნებლივ და არაუგვიანეს 24 საათისა, შეატყობინოს შესაბამის ორგანოებს (შსს, სახანძრო სამსახური და ა.შ.) ამის შესახებ.
- 6.1.9. მიაწოდოს მზღვეველს წერილობითი განცხადება სადაზღვევო ანაზღაურებაზე. განცხადებაში მითითებული უნდა იყოს წარმოშობილი ზარალის ყველა გარემოება და მიზეზი, აგრეთვე წარუდგინოს დოკუმენტები კომპეტენტური ორგანოებიდან, რომლებშიც დადასტურებულია სადაზღვევო შემთხვევის დადგომის ფაქტი, მიზეზები და ზარალის ზომა.
- 6.1.10. წარუდგინოს მზღვეველს განადგურებული, დაზიანებული ან დაკარგული დაზღვეული ობიექტების ნუსხა.
- 6.1.11. უზრუნველყოს მზღვეველი ზარალის მიმყენებლის მიმართ რეგრესიული მოთხოვნების განხორციელების შესაძლებლობებით.

- 6.1.12. მზღვეველს მისცეს საშუალება შეამოწმოს/დაათვალიეროს დაზიანებული ქონება მის რემონტამდე ან დაზიანებული ქონების ნარჩენები, აგრეთვე დაზიანებული ნაწილები, დეტალები და ა.შ. და საჭიროების შემთხვევაში უზრუნველყოს მზღვეველი ექსპერტიზის ჩატარების შესაძლებლობით;
- 6.1.13. განახორციელოს საქართველოს კანონმდებლობითა და წინამდებარე პირობებით გათვალისწინებული სხვა ქმედება.
- 6.1.14. ყველა ცნობის მიწოდება, რომელიც წინამდებარე პირობებით არის გათვალისწინებული, ხდება დამზღვევის მიერ წერილობითი ფორმით ან კავშირის ისეთი საშუალებით, რომელიც უზრუნველყოფს გადაცემული ცნობის ფიქსირებას ან გადაეცემა მზღვეველს მისი მიღების ხელმოწერის დადასტურებით;
- 6.1.15. დაუყოვნებლივ შეატყობინოს მზღვეველს ქონების მფლობელის ან ქონებით მოსარგებლის შეცვლის შესახებ.
- 6.1.16. თუკი დამზღვევის მიერ სადაზღვევო პოლისის შექმნა ხდება მესამე პირის – მოსარგებლის სასარგებლოდ, დამზღვევი ვალდებულია, წარმოადგინოს დაზღვეული ქონებისადმი მისი ინტერესის განმსაზღვრელი დოკუმენტი.
- 6.1.17. წინამდებარე ხელშეკრულებით განსაზღვრული დამზღვევის ვალდებულებები, თანაბარი ზომით ვრცელდება დაზღვეულზე და მოსარგებელზე. მის მიერ ამ ვალდებულებების შეუსრულებლობა იწვევს იგივე შედეგებს, რაც დამზღვევის შემთხვევაში.

6.2. დამზღვევი/მოსარგებლე უფლებამოსილია:

- 6.2.1. სადაზღვევო პოლისის დაკარგვის ან განადგურების შემთხვევაში მოთხოვოს მზღვეველს სადაზღვევო პოლისის განსაკუთრებული წარმოების წესით ძალადაკარგულად გამოცხადება ან მისი ასლის გაცემა.
- 6.2.2. მიიღოს სადაზღვევო ანაზღაურება ხელშეკრულების პირობების შესაბამისად;
- 6.2.3. მოსარგებლეს უფლება აქვს უარი თქვას მისი კუთვნილი სადაზღვევო ანაზღაურების მიღებაზე. ასეთ შემთხვევაში სადაზღვევო ანაზღაურების მიღების უფლება გადადის დამზღვევეზე;
- 6.2.4. მიიღოს ინფორმაცია სადაზღვევო პოლისის პირობების თაობაზე.

6.3. მზღვეველი ვალდებულია:

- 6.3.1. გააცნოს დამზღვევს წინამდებარე დაზღვევის პირობები;
- 6.3.2. დამზღვევზე გასცეს სადაზღვევო პოლისი;
- 6.3.3. სადაზღვევო პოლისის, დამზღვევის მიერ დასაბუთებული და მტკიცებულებებით დადასტურებული საპრეტენზიო განაცხადის ან/და მზღვეველის მოთხოვნით ყველა საჭირო დოკუმენტაციის (მათ შორის სხვა ხელშეკრულებების შესახებ, სადაც ამ პირობებით დაზღვეული ქონება ან მისი ნაწილი წარმოადგენს დაზღვევის ობიექტს) წარდგენიდან 10 (ათი) სამუშაო დღის ვადაში წერილობით გასცეს გადაწყვეტილება;
- 6.3.4. გადაწყვეტილების მიღებიდან 10 (ათი) სამუშაო დღის ვადაში დამზღვევზე გასცეს სადაზღვევო ანაზღაურება ან მოტივირებული უარი (პატივსაცემი მიზეზების არსებობის შემთხვევაში მზღვეველი უფლებამოსილია, გაზარდოს ამ პუნქტითა და 6.3.3. პუნქტით განსაზღვრული ვადა);
- 6.3.5. აანაზღაუროს ის ხარჯები, რომლებიც მისი მითითებით (ინსტრუქციით) იქნა გაღებული. ამ ხარჯების ანაზღაურება ხდება სადაზღვევო პოლისში მითითებული სადაზღვევო თანხის ფარგლებში, ფრანშიზის გათვალისწინებით.
- 6.3.6. აანაზღაუროს მხოლოდ ის ზიანი რომელიც ქონებას მიაღდა წინამდებარე ხელშეკრულებით და/ან შესაბამისი სადაზღვევო პოლისით განსაზღვრული სადაზღვევო პერიოდის განმავლობაში;
- 6.3.7. კანონმდებლობით განსაზღვრული შემთხვევების გარდა, არ გაამჟღავნოს მონაცემები დამზღვევსა/დაზღვეულსა და მის ქონებრივ მდგომარეობაზე.

6.4. მზღვეველი უფლებამოსილია:

- 6.4.1. დაზღვევის ხელშეკრულების დადებამდე მოახდინოს დასაზღვევი ქონების დათვალიერება რისკის შეფასების მიზნით;
- 6.4.2. მონაწილეობა მიიღოს შემთხვევის (ზიანის) მიზეზების დადგენასა და ზარალის სიდიდის შეფასებაში, მოსთხოვოს ხელშეწყობა დამზღვევს ან დაზღვეულს;
- 6.4.3. თუ დამზღვევის, დაზღვეულისა ან მოსარგებლისათვის ზიანის ანაზღაურების შემთხვევაში გაირკვა, რომ სადაზღვევო შემთხვევა გამოწვეული იყო მესამე პირის ქმედებით, გამოიყენოს რეგრესის წესი და მოთხოვოს ანაზღაურება გაცემული თანხის ფარგლებში;
- 6.4.4. თუ დამზღვევის (დაზღვეულის, მოსარგელის) ბრალით მზღვეველის მიერ რეგრესის წესის გამოყენება შეუძლებელი გახდა, მოითხოვოს გაცემული სადაზღვევო ანაზღაურების უკან დაბრუნება;
- 6.4.5. გააუქმოს სადაზღვევო პოლისი და შესთავაზოს დამზღვევს შეცვლილი პირობებით პოლისის მიღება, თუ შეიცვალა ქონების ექსპლუატაციის პირობები;
- 6.4.6. გააუქმოს სადაზღვევო პოლისი და ამის თაობაზე წერილობით შეატყობინოს დამზღვევს, თუ ქონების დაზღვევის განაცხადში აღნიშნული მონაცემები არ შეესაბამება სინამდვილეს;

- 6.4.7. გაგზავნოს შესაბამისი შევითხვები კომპეტენტურ ორგანოებში;
- 6.4.8. შევიდეს, დაათვალიეროს ის ქონება ან შენობა სადაც დადგა ზარალი და განახორციელოს ყველანაირი ქმედება, რასაც ჩათვლის საჭიროდ ზიანის შემცირებისათვის ან დაზიანებული ქონების მდგომარეობის შესანარჩუნებლად;
- 6.4.9. მოითხოვოს ზარალის დადგომის დროს, დაზღვეულ შენობებში არსებული ქონების, გადატანა, ან მათი შენახვა;
- 6.4.10. შეინახოს ასეთი ქონება და შეისწავლოს, დაახარისხოს, წესრგობი მოიყვანოს და ა.შ;
- 6.4.11. შეადგინოს ქონების აღდგენა-შეკეთების ღირებულების კალკულაცია (ნუსხა), დაზიანების ხარისხიდან გამომდინარე;
- 6.4.12. არ გასცეს სადაზღვევო ანაზღაურება დამზღვევის/დაზღვეულის/მოსარგებლის მიერ ქონების დაზღვევის პირობებით გათვალისწინებული ვალდებულებათა შეუსრულებლობისას.
- 6.4.13. გადაავადოს ანაზღაურების გაცემა იმ შემთხვევაში თუ:
 - ტარდება დამოუკიდებელი ექსპერტიზა სადაზღვევო შემთხვევის გამომწვევი მიზეზების, გარემოებებისა და ზარალის მოცულობის შესახებ. ამასთან, სადაზღვევო ანაზღაურების გადახდის ვადა იზრდება ექსპერტიზისათვის საჭირო დროის პერიოდით;
 - არსებობს საფუძვლიანი ეჭვი თქვენი ან მოსარგებლის მიერ სადაზღვევო ანაზღაურების მიღების უფლებამოსილებაში. სადაზღვევო ანაზღაურება არ გადაიხდება, ვიდრე არ იქნება წარმოდგენილი შესაბამისი მტკიცებულებები;
 - შსს ორგანოების მიერ აღმოჩენილია სისხლის სამართლის საქმე სადაზღვევო შემთხვევაზე, დაზღვეულის/მოსარგებლის მიმართ – გამოძიების დასრულებამდე.

7. სადაზღვევო ანაზღაურების გაცემის წესები და პირობები

- 7.1. სადაზღვევო ანაზღაურების გაცემა ხორციელდება სადაზღვევო პოლისის, წინამდებარე პირობების, ზარალის ანაზღაურების თაობაზე დამზღვევის (მოსარგებლის) წერილობითი განაცხადის, შემთხვევის დადგომის დამამტკიცებელი დოკუმენტაციის, ანაზღაურების გაცემის შესახებ გადაწყვეტილებისა და დამდგარი ზიანის გაანგარიშების საფუძველზე. ასევე გონივრულ ფარგლებში მზღვეველის მიერ დამატებით განსაზღვრული/მოთხოვნილი ინფორმაციის და/ან დოკუმენტაციის საფუძველზე.
- 7.2. ზარალად განიხილება მხოლოდ სადაზღვევო პოლისით განსაზღვრული რისკების დადგომის შედეგად დაზღვეული ქონებისათვის მიყენებული ზიანი.
- 7.3. ზარალის სიდიდე განისაზღვრება მზღვეველის მიერ, დაზღვეული ობიექტის დათვალიერების და კომპეტენტური ორგანოების მიერ გაცემული საბუთების საფუძველზე (საქართველოს ჰიდრომეტეოროლოგიის, ბუნების დაცვის, საქართველოს სახანძრო დეპარტამენტის, საავარიო სამსახურების, პოლიციის, საგამომიებო ორგანოების, სასამართლოს და სხვა.) შემდგენიარად:
 - 7.3.1. ქონების გატაცების შემთხვევაში – შემთხვევის დადგომის მომენტისთვის მისი რეალური საბაზრო ღირებულების შესაბამისად, მაგრამ არაუმეტეს სადაზღვევო თანხისა;
 - 7.3.2. ქონების განადგურების შემთხვევაში – შემთხვევის დადგომის მომენტისათვის მისი აღდგენითი ან რეალური საბაზრო ღირებულების შესაბამისად, ნარჩენი ღირებულების გამოკლებით, მაგრამ არაუმეტეს სადაზღვევო თანხისა;
 - 7.3.3. ქონების დაზიანების შემთხვევაში ანაზღაურება გაიცემა მზღვეველის გადაწყვეტილებით დაზიანებული ქონების ან მისი ნაწილის აღდგენითი ან შენაცვლებითი ღირებულების ოდენობით.
 - 7.3.4. მარაგების დაკარგვის / დაზიანების შემთხვევაში - ყოველთვის თვითღირებულების ოდენობით.
 - 7.3.5. შენობის დაზიანების შემთხვევაში - ყოველთვის აღდგენითი ღირებულების ოდენობით.
 - 7.3.6. თუ ზიანის დადგომის დროისთვის დაზღვეული ქონების ან მისი რომელიმე ნაწილის ღირებულება სადაზღვევო პოლისში აღნიშნულზე მეტი აღმოჩნდება, ასანაზღაურებელი ზიანის თანხა შემცირდება ასეთივე პროპორციით, როგორც შეადგენს სადაზღვევო თანხა ქონების აღდგენით (შენაცვლებით) ღირებულებასთან.
- 7.4. საჭიროების შემთხვევაში მზღვეველი უფლებამოსილია გამოითხოვოს ცნობები სამართალდამცავი ორგანოებისა და სხვა ორგანიზაციებიდან, რომლებსაც გააჩნიათ ინფორმაცია შემთხვევის გარემოებების თაობაზე; მას აგრეთვე უფლება აქვს თავად გამოიკვლიოს სადაზღვევო შემთხვევის დადგომის მიზეზები და გარემოებები.
- 7.5. ერთ-ერთი მხარის მოთხოვნით ზარალის ოდენობის დადგენა შეიძლება განხორციელდეს დამოუკიდებელი ექსპერტიზის მეშვეობით, ექსპერტის მომსახურების ღირებულების მისი დამნიშნავი მხარის მიერ გადახდის პირობით.
- 7.6. გაანგარიშებაში ჩაითვლება მხოლოდ სადაზღვევო შემთხვევით გამოწვეული ხარჯები. ამასთან, ქონების დაზიანებული ნაწილების დეტალებისა და მოწყობილობების შეცვლის ღირებულება ჩაითვლება მხოლოდ იმ პირობით, რომ ისინი შეკეთების გზით ვერ მოიყვანება შემდგომი გამოყენებისათვის ვარგის მდგომარეობაში.
- 7.7. ქონების აღდგენის დანახარჯებში ჩაითვლება:
 - 7.7.1. აღსადგენად აუცილებელი მასალებისა და სათადარიგო ნაწილების შესაძენი ხარჯები;
 - 7.7.2. აღსადგენად გაწეული სამუშაოების ანაზღაურების ხარჯები;
- 7.8. ქონების აღდგენის დანახარჯებში არ ჩაითვლება:

- 7.8.1. ქონების ტექნიკური მომსახურებისა და საგარანტიო შეკეთების ღირებულება;
- 7.8.2. ქონების რეკონსტრუქციასთან ან მის გადაიარაღებასთან, მისი ცალკეული ნაწილების, დეტალებისა და მოწყობილობების, მათი გაცვეთის, ტექნიკური წუნისა და ა.შ. გამო შეკეთებასთან ან შეცვლასთან დაკავშირებული სამუშაოების ღირებულება;
- 7.8.3. დამატებითი დანახარჯები, გამოწვეული დაზღვეული ობიექტის ცვლილებით ან გაუმჯობესებით.
- 7.8.4. აღდგენითი სამუშაოებისას, დანახარჯებიდან გამოიქვითება რემონტის პროცესში გამოსაცვლელი დეტალების, აგრეგატების და ნაწილების ცვეთა. გამოქვითვის გაანგარიშება ხდება რეალური ღირებულებიდან სადაზღვევო შემთხვევის დადგომის დღისათვის და მსგავსი ახალი ნაწილების ფასებიდან გამომდინარე.
- 7.9. იმ შემთხვევაში, როდესაც ობიექტის შეკეთებისას (აღდგენისას) აღმოჩნდება სადაზღვევო შემთხვევით გამოწვეული ფარული დეფექტები, ასეთი დაზიანებისათვის სადაზღვევო ანაზღაურების გადასახდელად დამზღვევმა შეკეთების პროცესში უნდა მიმართოს მზღვეველს შესაბამისი განცხადებით. მზღვეველი მოვალეა შეადგინოს ახალი გაანგარიშება, დაადგინოს ზარალის ზომა და განახორციელოს სადაზღვევო ანაზღაურების გადახდა აღმოჩენილი დეფექტებისათვის წინამდებარე პირობებით დადგენილი წესითა და ვადებში.
- 7.10. ჯამური სადაზღვევო ანაზღაურება ყველა სადაზღვევო შემთხვევაზე გადაიხდება მოცემული ქონებისათვის პოლისით დადგენილი სადაზღვევო თანხის ფარგლებში.
- 7.11. თუ სადაზღვევო თანხა ნაკლებია ქონების ღირებულებაზე (მაგალითად: იპოთეკით დატვირთული ქონების დაზღვევისას), სადაზღვევო შემთხვევის დადგომისას ზარალის თანხა ანაზღაურდება იმ პროპორციით, რა პროპორციასაც შეადგენს სადაზღვევო თანხა ქონების რეალურ (საბაზრო) ღირებულებასთან ზარალის დადგომის მომენტისთვის.
- 7.12. სადაზღვევო ანაზღაურება გადაიხდება მზღვეველის მიერ უნაღლო ანგარიშსწორებით ან სხვა, კანონმდებლობით დაშვებული, წესითა და ურთიერთშეთანხმების საფუძველზე.
- 7.13. სადაზღვევო ანაზღაურების გადახდის შემდეგ სადაზღვევო თანხა მცირდება სადაზღვევო შემთხვევის დადგომის დღიდან გადახდილი ანაზღაურების სიდიდით.
- 7.14. სადაზღვევო შემთხვევით გამოწვეული ზარალის ლიკვიდაციისა და ქონების აღდგენის (შეკეთების) შემდეგ დამზღვევი მოვალეა წარუდგინოს ქონება მზღვეველს. წინააღმდეგ შემთხვევაში მზღვეველს მისი განმეორებით დაზიანებისათვის პასუხისმგებლობა არ ეკისრება.
- 7.15. თუ დამზღვევს სადაზღვევო ანაზღაურების მიღების შემდეგ დაუბრუნდა გატაცებული ქონება ან აუნაზღაურდა ზარალი ამ ზარალისათვის პასუხისმგებელი პირის მიერ, იგი მოვალეა დაუბრუნოს მზღვეველს მიღებული სადაზღვევო ანაზღაურება, ქონების აღდგენაზე (შეკეთებაზე) გაწეული ხარჯების გამოკლებით.
- 7.16. იმ შემთხვევაში, როდესაც სადაზღვევო შემთხვევის დადგომისას ამ პოლისით დაზღვეული ქონების მიმართ მოქმედებდა სხვა ხელშეკრულებებიც, სადაზღვევო ანაზღაურება გადაიხდება იმ სადაზღვევო თანხების პროპორციულად, რომლებითაც დააზღვია ეს ქონება თითოეულმა მზღვეველმა.
- 7.17. თუ სადაზღვევო შემთხვევის დადგომასთან დაკავშირებულ ფაქტებზე აღძრულია სისხლის სამართლის საქმე, ან დაწყებულია სასამართლო პროცესი, მზღვეველის მიერ გადახდის თაობაზე გადაწყვეტილების მიღება შეიძლება გადავადებულ იქნას გამოძიების ან სასამართლო გარჩევის დამთავრებამდე.

8. გამონაკლისები

მზღვევი არ აანაზღაურებს იმ ზარალს, რომლის მიზეზია:

- 8.1. ყველა სახის საომარი მოქმედება (მიუხედავად ომის გამოცხადებისა თუ გამოუცხადებლობისა), სამოქალაქო მღელვარება, მასობრივი არეულობა, გაფიცვა, სამხედრო გადატრიალება ან სახალხო აჯანყება, რევოლუცია, სამხედრო ან უზურპირებული ხელისუფლება, სამხედრო ან საგანგებო მდგომარეობა ან სხვა ნებისმიერი მოვლენა ან გარემოება, რის გამოც ცხადდება ან გამოცხადებულია სამხედრო ან საგანგებო მდგომარეობა, ტერორიზმი, კონფისკაცია, რეკვიზიცია, დაპატიმრება;
- 8.2. ბირთვული აფეთქება, რადიოაქტიური დაბინძურება;
- 8.3. სამხედრო ან სამოქალაქო ხელისუფლების განკარგულებით ქონების განადგურება ან დაზიანება;
- 8.4. დამზღვევის ან მოსარგებლის განზრახ ან უხეში გაუფრთხილებლობით ჩადენილი ქმედება, რომელიც პირდაპირ ან არაპირდაპირ იყო მიმართული სადაზღვევო შემთხვევის დადგომის გამოსაწვევად;
- 8.5. დამზღვევის ან მოსარგებლის დანაშაულის განზრახ ჩადენა, რომელიც პირდაპირ ან არაპირდაპირ მიზეზობრივ კავშირშია სადაზღვევო შემთხვევასთან;
- 8.6. დამზღვევის მიერ მზღვეველისათვის სადაზღვევო ობიექტის შესახებ მისთვის წინასწარი შეცნობით მცდარი ინფორმაციის მოწოდება;

- 8.7. დაზღვეული ქონების დეფექტები და ნაკლოვანებები, რომლებიც დამზღვევისთვის ცნობილი იყო სადაზღვევო შემთხვევის დადგომამდე;
- 8.8. დაზღვეული ქონების გამოყენება ნებისმიერი მიზნით განაცხადში მითითებული მიზნების გარდა, მზღვეველთან წინასწარი შეთანხმების გარეშე;
- 8.9. ნებისმიერი სახის მოწყობილობის ან დანადგარის ელექტრული დაზიანება, რომელიც პირდაპირ ან არაპირდაპირ არის გამოწვეული მოკლე ჩართვით ან დენის ცვალებადობით, ეს გამონაკლისი არ ეხება ამ შემთხვევით გამოწვეულ ხანძარს;
- 8.10. თვითმფრინავის ან სხვა საჰაერო ტრანსპორტის ბგერითი ან ზებგერითი სიჩქარის ფრენისას წარმოშობილი წნევის ტალღები;
- 8.11. კანონმდებლობით განსაზღვრული სახანძრო უსაფრთხოების წესებისა და ნორმების დაუცველობა (თუ ეს კანონმდებლობით არის გათვალისწინებული);
- 8.12. ქონების აუხსნელი გაუჩინარება, თაღლითობა, საკუთრების მითვისება, ქურდობა ძალისმიერი შეღწევის გარეშე.
- 8.13. სადაზღვევო ანაზღაურება არ გაიცემა:
 - თუ დამზღვევმა არ განაცხადა მომხდარის შესახებ კომპეტენტურ ორგანოებში, შემთხვევა კი ამას მოითხოვდა, ან შემთხვევის ფაქტი კომპეტენტური ორგანოების მიერ არ დადასტურდა;
 - თუ დამზღვევმა, ჰქონდა რა ამის საშუალება, განსაზღვრულ ვადაში, წერილობით არ განუცხადა მზღვეველს ზიანის დადგომის შესახებ, ან თუ მის მიერ მითითებული ფაქტები სწორი არაა ან არ მიაწოდა სრულად მის ხელთ არსებული ინფორმაცია;
 - თუ დამზღვევმა შემთხვევის დადგომამდე არ განუცხადა მზღვეველს ქონების ექსპლუატაციის პირობების შეცვლის შესახებ ან ქონების დაზღვევის განაცხადში მითითებული მონაცემები სინამდვილეს არ შეესაბამება;
 - კანონმდებლობით ან/და ამ პირობებით განსაზღვრულ სხვა შემთხვევებში.

9. დაზღვევის მოქმედების ვადა

- 9.1. დაზღვევის მოქმედების ვადა, არა უმეტეს ერთი წლისა, განისაზღვრება სადაზღვევო პოლისით.
- 9.2. თუ სადაზღვევო პოლისით სხვა რამ არ არის გათვალისწინებული, სადაზღვევო პოლისის ძალაში შედის დამზღვევის მიერ მზღვეველისათვის ერთჯერადი ან პირველი სადაზღვევო შესატანის გადახდის მომენტიდან.
- 9.3. დაზღვევის მოქმედება იწყება პოლისის გაცემის დღის 24:00 საათიდან და მთავრდება პოლისში მითითებული დაზღვევის დასრულების დღის 24:00 საათზე.
- 9.4. დაზღვევა შეწყდება:
 - მხარეთა ორმხრივი შეთანხმებით ნებისმიერ დროს;
 - ხელშეკრულებით დადგენილი ვადის გასვლის შედეგად;
 - სადაზღვევო თანხის ამოწურვის შედეგად;
 - სადაზღვევო ინტერესის შეწყვეტის შემთხვევაში;
 - თუ დაზღვეულმა ობიექტმა შეწყვიტა თავისი არსებობა სადაზღვევო შემთხვევისაგან განსხვავებული მიზეზით;
- 9.5. დამზღვევის ინიციატივით დაზღვევის ხელშეკრულების შეწყვეტის შემთხვევაში იგი ვალდებულია, შეწყვეტის სავარაუდო თარიღამდე ერთი თვით ადრე წარუდგინოს წერილობითი განცხადება მზღვეველს, ხოლო სადაზღვევო პრემიის გადახდა მოხდება შემდეგნაირად: ა) ვადაზე ადრე შეწყვეტისას გადახდილი/გამოუმუშავებელი სადაზღვევო პრემია ექვემდებარება დაბრუნებას, გადახდილი/გამოუმუშავებელი სადაზღვევო პრემიის 10%-ის გამოკლებით. ბ) თუკი სადაზღვევო პოლისის ფარგლებში, რომლის ვადაზე ადრე შეწყვეტა ხდება, განვლილი სადაზღვევო პერიოდის განმავლობაში გაცემულია სადაზღვევო ანაზღაურება, პრემია დაბრუნებას არ ექვემდებარება;
- 9.6. დაზღვევის პროლონგაცია შესაძლებელია მხარეთა შეთანხმებით. მზღვეველი უფლებამოსილია უარი თქვას დაზღვევის პროლონგაციაზე (ვადის გაგრძელებაზე) ან შეცვალოს სადაზღვევო პრემია და პირობები შემდეგ შემთხვევებში:
 - გასულ სადაზღვევო წელს ზარალიანობის მაღალი მაჩვენებელი;
 - რისკის გაზრდა;
 - სადაზღვევო ბაზარზე ფასების ცვლილება.

10. სადაზღვევო პრემია. ანგარიშსწორების წესი

- 10.1. სადაზღვევო პრემია არის სადაზღვევო პოლისში მითითებული დამზღვევის მიერ ერთჯერადად ან მზღვეველთან შეთანხმებული გრაფიკით ნაღდი ან უნაღდო ანგარიშსწორების წესით გადასახდელი დაზღვევის საფასური სადაზღვევო დაფარვის უზრუნველყოფისათვის;
- 10.2. სადაზღვევო პრემიის ოდენობა დგინდება მზღვეველის მიერ დაზღვევის ობიექტის სახეობის, მისი ღირებულების, რისკის ხარისხისა და სხვა გარემოებათა გათვალისწინებით;

- 10.3. სადაზღვევო პრემიის ან/და მისი ნაწილის დროულად და დადგენილი ოდენობით გადახდის ვალდებულება ეკისრება დამზღვევეს;
- 10.4. სადაზღვევო პერიოდის განმავლობაში რისკის გაზრდის შემთხვევაში სადაზღვევო პრემია შეიძლება გაიზარდოს;
- 10.5. დამზღვევის მიერ სადაზღვევო პრემიის ან მისი ნაწილის გადახდა ხორციელდება ანგარიშ-ფაქტურის საფუძველზე, ამ პირობების ხელმოწერისთანავე მზღვეველის წარმომადგენლობაში, რაზედაც გაიცემა თანხის გადახდის დამადასტურებელი დოკუმენტი, ან/და მზღვეველის მიერ მითითებულ ანგარიშზე გადარიცხვით (უნაღლო ანგარიშსწორება).
- 10.6. სადაზღვევო პოლისით გათვალისწინებული პირველი ან ერთჯერადი სადაზღვევო პრემიის დამზღვევის მიერ, დადგენილი წესით, გადახდამდე მზღვეველი თავისუფალია წინამდებარე ხელშეკრულებით ნაკისრი ვალდებულებების შესრულებისაგან;
- 10.7. პრემიის განვადებით გადახდის შემთხვევაში, სადაზღვევო შემთხვევის შედეგად ქონების სრული განადგურებისას გასაცემ სადაზღვევო ანაზღაურებას აკლდება ის თანხა, რომელიც დამზღვევეს განვადების პირობების მიხედვით, დარჩენილ პერიოდში აქვს გადასახდელი. ხოლო ნაწილობრივი დაზიანების შემთხვევაში სადაზღვევო პრემიის არსებული დავალიანება (ასეთის არსებობის შემთხვევაში). ამ პუნქტის საფუძველზე ჩათვლილი თანხები ჩაითვლება გადახდილი სადაზღვევო პრემიის ოდენობაში;
- 10.8. „დამზღვევის“ მიერ სადაზღვევო პრემიის გადახდის წესის დარღვევის შემთხვევაში(იმ შემთხვევაში, თუ გადაუხდელი პრემიის პერიოდი აღემატება 6 თვეს) „მზღვეველი“ უფლებამოსილია არ აანაზღაუროს დავალიანების პერიოდში დამდგარი ზარალი;
- 10.9. სადაზღვევო პრემიის გადახდისას თუკი დაზღვევის მოქმედება წყდება ვადამდე, მზღვეველი იღებს ვალდებულებას, დაუბრუნოს დამზღვევეს მის მიერ გადახდილი გამოუმუშავებელი სადაზღვევო პრემია, გარდა იმ შემთხვევებისა, როდესაც კონკრეტული სადაზღვევო პოლისის ფარგლებში, რომლის გაუქმებაც ხდება ვადაზე ადრე, განვლილი სადაზღვევო პერიოდის განმავლობაში გაცემული არის სადაზღვევო ანაზღაურება.

11. შეტყობინება და ინფორმაციული უზრუნველყოფა

- 11.1. მხარეთა მიერ ერთმანეთის დაუყოვნებელი ინფორმაციული უზრუნველყოფა ხდება ტელეფონის, ფაქსის ან/და კავშირის საყოველთაოდ აღიარებული სხვა საშუალებებით;
- 11.2. დაუყოვნებელი ინფორმაცია მიწოდებულად ჩაითვლება კონტრაგენტის ან/და ამ მიზნისათვის სპეციალურად უფლებამოსილი პირის ტელეფონის, ფაქსის ან/და კავშირის საყოველთაოდ აღიარებული სხვა საშუალებებით კონტაქტის დაფიქსირებით;
- 11.3. მხარეთა მიერ ერთმანეთის წერილობითი ინფორმაციული უზრუნველყოფა ხდება დაზღვეული წერილის ან/და წერილობითი დოკუმენტის კონტრაგენტისათვის ან/და ამ მიზნისათვის სპეციალურად უფლებამოსილი პირისათვის პირადად ჩაბარებით;
- 11.4. წერილობითი ინფორმაცია მიწოდებულად ჩაითვლება კონტრაგენტის ან/და ამ მიზნისათვის სპეციალურად უფლებამოსილი პირის სათანადო დოკუმენტზე ხელმოწერითა და დროის დაფიქსირებით;
- 11.5. სადაზღვევო პოლისის მიზნებისათვის დამზღვევის (მოსარგებლის, დაზღვეულის) მხრიდან საინფორმაციო უზრუნველყოფისათვის უფლებამოსილი პირის რეკვიზიტები;
- 11.6. სადაზღვევო პოლისის მიზნებისათვის მზღვეველის საინფორმაციო უზრუნველყოფისათვის გამოიყენება მისი წარმომადგენლობის ფაქტიური ადგილსამყოფელი ან/და “ასის ასისტანსის” სამსახური.

12. სადავო საკითხების გადაწყვეტა

- 12.1. სადაზღვევო პოლისთან დაკავშირებით წამოჭრილი ნებისმიერი დავა გადაწყდება მხარეთა ურთიერთშეთანხმებით;
- 12.2. შეუთანხმებლობის შემთხვევაში, დავას გადაწყდება საქართველოს კანონმდებლობის შესაბამისად.

13. განსაკუთრებული პირობები

- 13.1. დამზღვევის ვალდებულებები თანაბრად ვრცელდება დაზღვეულზე ან/და მოსარგებელზე;
- 13.2. თუ დამზღვევის (დაზღვეულის, მოსარგებლის) ბრალით მზღვეველის მიერ რეგრესის წესის გამოყენება შეუძლებელი გახდა, მზღვეველს უკან უბრუნდება სადაზღვევო ანაზღაურება იმ პირისაგან, ვინც ის მიიღო ან/და მზღვეველს უფლება ექნება უარი თქვას სადაზღვევო ანაზღაურების გაცემაზე;
- 13.3. მზღვეველის პასუხისმგებლობა შეზღუდულია სადაზღვევო თანხის ოდენობით, მიუხედავად სადაზღვევო პერიოდში მომხდარი სადაზღვევო შემთხვევების სიმრავლისა და მათი სიდიდისა;
- 13.4. თუ დამზღვევემა ან/და დაზღვეულმა განზრახ გამოიწვია სადაზღვევო რისკის გაზრდა, მზღვეველს შეუძლია გააუქმოს დაზღვევის პოლისი სადაზღვევო პრემიის დაბრუნების გარეშე, ყოველგვარი ვადის დაუცველად;

- 13.5. ამ პირობებში ცვლილებებისა და დამატებების შეტანა უნდა გაფორმდეს წერილობით, რომელიც ძალაში შევა მხარეების ან ამისთვის უფლებამოსილი პირების მიერ მისი ხელმოწერისთანავე;
- 13.6. შესაბამისი წესით გაფორმებული ცვლილება ან/და დამატება თან ერთვის პირობებს და მის განუყოფელ ნაწილს წარმოადგენს;
- 13.7. ფორს-მაჟორული გარემოებების არსებობისას (ომი, სტიქიური უბედურება, მთავრობის აქტები ან/და სხვა ისეთი გარემოებანი, რომლებიც არ არის დამოკიდებული მხარეთა ნებაზე), მხარეები ხელშეკრულებით გათვალისწინებული წესითა და პირობებით აცნობებენ ამის შესახებ ერთმანეთს; ასეთ შემთხვევაში ნაკისრი ვალდებულების შესრულება გადავადდება ფორს-მაჟორული გარემოებების აღმოფხვრამდე ან/და გამოსწორებამდე;
- 13.8. წინამდებარე ხელშეკრულებას დანართის სახით ახლავს დამზღვევის საიდენტიფიკაციო მონაცემები (ფიზიკური პირის შემთხვევაში პირადობის დამადასტურებელი სახელმწიფო დოკუმენტის ასლი, იურიდიული პირის შემთხვევაში ამონაწერი მეწარმეთა და არასამეწარმეო იურიდიულ პირთა რეესტრიდან, წარმომადგენლობითი უფლებამოსილების მქონე პირის პირადობის დამადასტურებელი სახელმწიფო დოკუმენტის ასლი და მინდობილობა თუკი ხელშეკრულებას ხელს აწერს მინდობილი პირი).
- 13.9. საიდენტიფიკაციო მონაცემებში ნებისმიერი ცვლილების შეტანის შემთხვევაში, დამზღვევი ვალდებულია, არაუგვიანეს სამი სამუშაო დღისა შეატყობინოს მზღვეველს აღნიშნული შესახებ და მიაწოდოს შესაბამისი დოკუმენტაცია. წინააღმდეგ შემთხვევაში დაზღვევი ვალდებულია, სრულად აანაზღაუროს ზიანი, რომელიც მზღვეველს მიადგება ამგვარი შეუტყობინებლობის ან დოკუმენტაციის მიუწოდებლობის შედეგად (მათ შორის შესაბამისი სახელმწიფო ორგანოს მიერ დაკისრებული ფინანსური სანქცია).